

四庫全書

史部

欽定四庫全書

姑蘇志卷三十八

明 王鏊 撰

宦蹟二

燕王靈夔江王元祥滕王元嬰皆唐高祖子也貞觀十
年三月出諸王為都督靈夔以十一年代襲蘇州刺史
史十三年罷代襲之制進封魯公高宗末又以太子

太師刺蘇州

按韓王元嘉傳時武后臨朝攝政欲
順物情雖外示尊崇實無所綜理

元

祥以貞觀十一年自許王冊授使持節蘇州諸軍事

蘇州刺史改封江王元嬰以永徽三年自金州刺史遷蘇州又轉洪州都督元祥性庸邁所至營財產無厭與元嬰等皆貪暴時語曰寧向儋崖振白不事江滕蔣號

曹王明太宗子也母楊氏本巢王妃貞觀末封曹王高宗詔復巢王累為都督刺史調露中蒞蘇澤王上金高宗子也武后文明元年授蘇州刺史明年改陳州郎餘慶新樂人為吏清而刻於法高宗朝累遷御史中

丞務謙謹下人久之出為蘇州刺史坐累下遷交州都督

袁誼長安人開耀初蘇州刺史司馬張沛白誼曰州得

一長史隴西李亶天下甲門也誼曰夫門戶者歷世

名節為天下所高老夫是也山東人尚婚媾求祿利

耳至見危授命則無人焉何足尚邪沛大慙

此據通鑑修按

本傳為郡在神功中後開耀十六年未詳孰是

孔禎唐高宗朝為州長史時刺史曹王明不循法度禎

每進諫明曰寡人天子之弟豈失於王哉禎曰恩義不可恃大王不奉行國命恐今之榮位非大王所保獨不見淮南之事乎明不悅明左右有侵暴下人禎捕而杖殺之明後果坐法遷黔中謂人曰吾愧不用孔長史之言以及於此累遷絳州刺史

張廷珪字溫玉濟元人慷慨有志尚開元中由沔州刺史徙蘇五年奏復置海鹽縣卒謚貞穆

張均洛陽人丞相說之子也有文名歷兵部侍郎以累

貶饒蘇二州刺史久之遷刑部尚書

吳從衆開元中為刺史兼採訪使二十八年割太湖洞庭三鄉與吳興互換

武平一沛國人博學工文詞武后時畏禍不敢與事累詔不應中宗復位召為起居舍人修文館直學士開元中自考功員外郎貶蘇州參軍既謫而名不衰徙金壇令

趙居貞鼓城人國子祭酒冬曦之弟天寶九載二月自

揚州長史遷吳郡太守十載正月封會稽山神為永興公命居貞往祭三月十七日行禮冊是年居貞又

立春申君廟碑

題銜作中散大夫守吳郡太守兼江南道採訪處置使舊志作比部郎中

又奏割崑山嘉興海鹽地置華亭縣又於海鹽置海寧鎮

韋之晉京兆人上元中為蘇州刺史時淮泗不寧中外震動韋元甫自御史中丞出為洪州都督由是鄰國藩屏大臣皆輻湊議欲同盟靖難杜烜至自廣陵杜

鴻漸至自會稽韋還自京口徐浩自合肥而之晉自吳偕會馬獨孤及作豫章冠蓋盛集記

李刺史

名闕

襄武人蘇州刺史兼御史中丞獨孤及稱其

為郡日值海寇之亂事平徵還道卒贈吏部侍郎及又代房琯撰祭文稱其孝友慈惠公廉貞直姑蘇之役姦鋒構難公秉義勇誅其渠魁海寇圍逼勾吳震駭公率羸師克翦大敵奇謀生於死地貞節見於孤

城

韋元甫少修謹敏於學術以吏能知名所蒞皆有聲遷
蘇州刺史浙西都團練觀察使大厯初宰相杜鴻漸
薦之三年徵為尚書右丞

蕭定字梅臣右僕射瑀之曾孫累遷素潤信宋湖蘇六
州刺史大厯中有司差天下刺史治最定與常州蕭
復濠州張鎰為第一而幼桑租均賦稅勞徠游口在
鎰復之右遷戶部侍郎官至太子少師

李丹太子太保詳之子也

宗室表
作岑子

為蘇州刺史浙西觀

察使著蘇州聖賢冢墓記一卷

李栖筠字貞一趙人莊重寡言體貌軒特喜書多所通
曉為文章勁迅有體要不安交游累遷工部侍郎魁
然有宰相望元載嫉之出為常州刺史蘇州豪士方
清因歲凶誘流莩為盜積數萬依黥歙間阻山自防
東南厭苦李光弼分兵討平之會平盧行軍司馬許
杲恃功擅留上元有窺江吳意朝廷重起兵即拜栖
筠蘇州刺史兼御史中丞浙西都團練觀察使圖之

栖筠至張設武備遣辯士厚齎金帛抵果軍賞勞使
士歆愛奪其謀果懼悉衆渡江掠楚泗而潰以功進
兼御史大夫則又增飭學廬表宿儒河南褚沖吳何
負等超拜學官為之師身執經問義遠邇趨慕至徒
數百人及表劉太真為常熟令又奏部中豪姓多徙
貫京兆河南規脫徭科請量產出賦以杜姦謀元載
拜御史益恣橫代宗除引剛鯁大臣自助欲收綱權
以黜載拜栖筠御史大夫栖筠劾載黨數人帝屢

欲召相憚載輒止然有進用皆密訪焉栖筠多所補助見帝依違不斷亦內憂憤卒謚文獻孫德裕別有傳

裴胄字脣叔河南人簡儉恒一累官監察御史不得意左遷桐廬尉時浙西觀察使李栖筠有重望虛心下士幕府盛選才彥觀察判官許鳴謙有學識栖筠嘗異席事多諮之崔造輩皆所薦引一見胄深重之薦於栖筠奏授大理評事觀察支使

栢良器字公亮年十七在太尉李光弼幙中大厯初以左金吾衛將軍加檢校光祿大夫兼蘇州別駕加試殿中監監察御史刺史李栖筠問其年對曰二十有四戰陣幾何曰六十有二因泣涕言遭時喪亂父死家破誓棄性命以除寇讐粗志未立豈敢求明公之知邪建中初至京師宰相楊炎召與之語因言刺史李道昌無善政遂以韓滉代焉良器位至將相圖形凌烟閣

林披字彥則莆田人年二十以經業擢第為汀州別駕
大厯中御史大夫李栖筠奏授太子詹事兼蘇州別
駕有九子皆為刺史號九牧林家

李涵簡素恭慎有名宗室以兵部侍郎為蘇州刺史兼

御史中丞充浙西觀察使十一年除知臺事京畿觀

察使

按獨孤及撰涵父少康碑云七年五月由兵部侍郎為御史大夫又建中三年五月中書門下

奏得蘇州刺史兼御史大夫知臺事
李涵等狀釐革到諸道觀察使料錢

韓滉字太仲長安人有美名所交皆時之俊彥代宗朝

自晉州刺史移蘇州領浙江東西都團練觀察使安

輯百姓均其租稅未踰年境內稱治

按本傳移郡領使不帶兼官尋

加銀青光祿大夫二年五月加檢校禮部尚書加御史潤州刺史鎮海軍節度使依前浙江東西道觀察等使而通鑑云大厯十四年十一月由晉州刺史除蘇州并領觀察使蓋大厯所除而建中初任也一云

自饒州刺史轉蘇州丁母憂起為江陵少尹

李復字初陽宗正卿齊物之子歷饒蘇容三州刺史卒

謚昭復更歷方鎮所在稱治

韋應物洛陽人周道遙公賈之後自言天寶中以三衛

郎事玄宗豪縱不羈及游太學以氣凌蔑諸生永泰
中為洛陽丞京兆尹功曹始折節讀書歷鄆櫟陽令
比部員外郎出為滁江二州刺史貞元初自左司郎
中為蘇州年五十餘在郡與秦系丘丹顧況釋皎然
相倡酬罷官後寓永定精舍信州刺史劉太真嘗與
書云顧著作來已知足下郡齋燕集想亦示何情致
暢茂適逸如此宋齊間沈謝蕭何始精於理意緣情
體物備詩人之指後之傳者甚失其原惟足下制其

橫流師摯之始闕睢之亂於足下之文見之矣李肇
稱其性高潔鮮食寡欲所居焚香掃地而坐其為書
馳驟建安已還各得風韻開元以後位卑而著名者
李北海王江寧李館陶鄭廣文元魯山蕭功曹張長
史獨孤常州崔比部梁補闕及蘇州爾白居易言應
物在蘇與杭州牧房孺復皆豪人也韋嗜詩房嗜酒
每與賓友一醉一咏其風流雅韻播於吳中或目韋
房為詩酒僊蓋其畫戟清香之辭最為警策宜時人

推重如此有集十卷子慶復監察御史

韓駒蔡寬夫詩話云唐史

不為應物立傳行事頗逸按白公吳郡詩石記言貞元初應物為刺史後三十七年樂天亦佩蘇印記中目應物為碩人則在當時已有重名又劉禹錫集有太和六年舉自代一狀然應物溫泉行云北風慘慘投溫泉忽憶先皇巡幸年身騎廐馬引天仗直至華清列御前又有出身天寶今幾年之語則嘗逮仕天寶間矣又燕李錄事詩云與君十五侍皇闈曉拂爐烟上玉墀考之天寶元年至太和六年計九十一年應物於天寶間已年五十不應能至太和間也說者謂禹錫與樂天同時視應物輩行迥不同禹錫所舉或別一人耳

孫晟字思退武水人父逖判刑部侍郎晟少知名通經

衍代宗朝為信州刺史有惠政郡人請立碑頌德優
詔褒美轉蘇州貞元四年移桂州

齊抗字遐舉義豐人太子詹事澣之孫也天寶亂抗隱
會稽刺史張鎰辟署幕府抗吏事閒敏有文雅自處
州刺史徙蘇潭二州召為觀察使卒謚曰成

李事舉趙郡人按李觀浙西觀察判官廳壁記云太原
王公廉察之七年署監察御史李事舉為觀察判官
九年冬蘇州刺史以憂去命事舉來撫吳地德美於

人化變儉人如春之和

按觀察使王緯嘗奏劾于
頔疑頔去而事舉攝郡爾

于頔字允元後周太師謹七世孫也以湖州刺史改蘇
州吳俗事鬼頔疾其淫祀廢生業凡神宇撤去惟存
泰伯子胥濬溝澮端路衢為政有績然暴橫少恩杖
前部尉以逞憾觀察使王緯以聞德宗不省俄遷大
理卿官終同中書門下平章事頔有專對才其馭衆
為政之術令行禁止出於法家文深意苛有犯無赦
崔衍安平人天寶末歷蘇號二州刺史遷宣歙池觀察

使衍簡靜儉約畏法室無妾媵祿稍周於親族妻子
僅免饑寒及卒不能藏喪詔贈賻帛米粟元和初復
詔褒美謚曰懿

韋夏卿字雲客萬年人善文辭大厯中為給事中屬東
南歲歉出為常州刺史以最績轉蘇州始至謀以息
民布令曰矜老疾活艱困凡在庶物令趣其本於是
鄉計之而白於縣縣上之郡夏卿乃條其年歲差並
與蠲放遂加秩賜金借留累歲擢吏部侍郎卒謚曰

獻夏卿性通簡好古為政務通理不甚作條教所辟士皆至宰相大官世稱知人

李素隴西人刺衢州一月遷蘇州李錡前反權將之戍諸州者刺史至斂手莫與敵素至十二日錡反素將左右與賊戰州門不勝賊呼入素端立責以義皆斂兵立不逼賊將姚志安送素致錡軍中將斬以徇素身具桎梏釘於船舷未及京口而錡敗素脫械還走州賊急卒不暇走死民抱扶迎盡出上使貴人持紫

衣金魚以賜居三年州稱治拜河南少尹

王叔文山陰人以棋待詔頗讀書班班言治道德宗詔
直東宮太子引以侍讀順宗立不能聽政羣臣奏事
以宮人宦官從帷中傳命黃任密語諸黃門陛下素
厚叔文即繇蘇州司功參軍拜起居郎翰林學士遷
戶部侍郎領度支鹽鐵副使賜金紫順宗崩貶渝州
司戶

王仲舒字弘中祁人少孤家于江南讀書著文有名于

時元和中由峽州刺史遷婺州在職五年有治政加
金紫轉蘇州變其屋居以絕火延堤松江路以絕阻
滯秋夏賦調自為書與人以期吏無及門而集化成
為天下守之最上以文誥有古風拜中書舍人復觀
察江南西道卒于官

按仲舒守蘇日祭權相國文在
元和十四年七月又光福寺題

名在四年與
傳不合未詳

范傳正字西老順陽人歷歙湖蘇三州刺史有殊政進
拜宣歙觀察使

張正甫字踐方南陽人元和中歷鄧蘇二州刺史湖南
觀察使正甫仁而端亮蒞官清廉居外任所至稱理
元錫字君貺河南人什翼犍十四世孫也歷衢婺蘇三
州刺史所至咸有聲績

崔俊字德長宰相祐甫從子也性介潔矜已之清視賊
負者若讐憲宗朝檢校職方郎中兼淮浙宣建等路
兩稅使尋為蘇州刺史破壞豪黠除去冗費歲中廩
藏皆羨溢遷潭州刺史卒謚肅

李諒長慶四年自泗州刺史奏最以御史中丞徙蘇州

賜紫

按柳宗元為王戶部薦諒狀云清明直方柔惠端信強以有禮幹而甚文乞除諫官使備獻納

白居易字樂天其先太原人自韓城徙下邳居易敏悟
絕人工文章未冠謁顧況況於時才少所推可見其
文自失曰吾謂斯文自絕今復得子矣貞元中擢進
士拔萃皆中補校書郎元和初以對策調盩厔尉為
集賢校理翰林學士遷左拾遺屢陳朝廷得失請以
學士兼京兆戶曹參軍又以言事貶江州司馬久之

徙忠州刺史入為司門員外郎以主客郎中知制誥
俄轉中書舍人遷杭州刺史入為太子左庶子分司
東都復刺蘇州病免文宗立以祕書監召遷刑部侍
中太和初移病還東都除太子賓客分司踰年拜河
南尹開成初拜太子少傅進馮翊縣侯會昌初以刑
部尚書致仕六年卒贈尚書右僕射居易被遇憲宗
時事無不言為當路所忌遂擯斥所蘊不能施乃放
意詩酒既復用又皆偃蹇不合居官輒病去遂無立

功名意在蘇時多燕遊嘗攜蟬滿容點茶十妓夜遊
西武丘山又賦紀遊詩云領郡時將久遊山數幾何
一年十二度非少亦非多自作醉吟先生傳又好浮
屠稱香山居士其文章精切最工詩頗以規諷得失
初與元稹酬咏號元白稹卒又與劉禹錫齊名號劉
白白敏中為相請謚有司曰文東都江州人皆為立
祠

狄兼謨字汝諧太原人梁公仁傑族孫剛正有祖風由

蘄鄧鄭三州刺史改蘇州以治最擢給事中遷御史
中丞東都留守

李紳字公垂世宦南方客潤州為人短小精悍有詩名
號短李穆宗朝為學士與李德裕元稹同在禁署時
稱三俊大和中歷蘇越二州刺史武宗召拜中書侍
郎同平章事卒諡文肅

劉禹錫字夢得系出中山世為儒工文章淮南杜佑表
管書記入為監察御史名重一時王叔文與之交順

宗即位叔文引禹錫及柳宗元與議政禁中擢屯田
員外郎判度支鹽鐵案憲宗立叔文等敗貶連州刺
史未至斥朗州司馬久之召還又出為播州刺史御
史中丞裴度請稍內遷乃易連州又徙夔州由和州
刺史入為主客郎中度又薦為禮部郎中集賢直學
士度罷出為蘇州刺史以政最賜金紫服從汝同二
州遷太子賓客復分司禹錫恃才而廢偃蹇寡合乃
以文章自適素善詩晚節尤精與白居易酬復頗多

推為詩豪會昌時加檢校禮部尚書卒

盧商字為臣范陽人以大理卿為蘇州刺史吏以鹽法求贏貨民愈困商令計口售鹽無常額人便之歲貲連增宰相上其勞進浙西觀察使召為刑部侍郎

韋刺史

名闕

大中五年在任是年奏復崑山慧聚寺六年建楞

伽上方大悲堂

按高僧傳釋常達居常熟破山宣宗重興精舍太守韋晤加力蓋即其人也

盧簡求字子臧范陽人檢校戶部郎中綸之子也為王仲舒牛僧孺參佐會昌中歷蘇壽二州刺史簡求為

政長權變多惠澤以太子少師致仕

按僧弘憲碑云
大中十二年來

撫茲郎本傳
作會昌中誤

皮日休字襲美襄陽人咸通八年進士十年崔璞守蘇
日休為軍事判官與進士陸龜蒙友善稱其才不減
溫庭筠李商隱雖風雨晦冥蓬蒿翳薈更相唱和未
嘗輟輟至忘寢食郡人與之遊者有恩王府參軍徐
修矩涇尉任晦前進士崔璐羊昭業進士顏萱鄭壁
司馬都秀才穰嵩起處士毘陵魏朴宦遊者則博士

南陽張貴侍御隴西李穀皆有詞致一年所賦詩至
六百五十餘首日休名曰松陵集自製序歷祕書省
校書郎嶺南東道節度巡官著書號鹿門子又有請
韓文公配享書桃花賦九諷七愛悼賈諸篇避廣明
之難徙會稽依錢氏官太常博士子光業字文通生
於蘇十歲能屬文吳越國相教令儀注多其所定美
容儀善談論若神僊中人贈禮部尚書孫璩為元帥
府判官三世皆以文雄江東

李繪乾符中為刺史二年四月王郢陷郡繪重修內城
三年以棄城貶官

張搏自湖州刺史移蘇州辟陸龜蒙以自佐種木蘭於
木蘭堂重修羅城刪治吳地記并繪郡圖

按舊唐書
作乾符二

年二月自湖移廬州又泚上英雄錄云楊行密徵時
隨本兵都押衙統兵送搏赴蘇州任屯兵吳苑據此
則自廬移蘇
也未審孰是

王搏字昭逸臨沂人方慶八世孫辟佐王鐸滑州節度
府累遷蘇州刺史乾寧初進同中書門下平章事遷

司空帝欲翦抑中官搏謂朝廷多難當徐以計去之時崔肩素忌搏明達有謀光化三年罷為工部侍郎貶崖州司戶賜死藍田驛

杜孺休字休之萬年人司徒佑之曾孫累擢給事中大順初錢鏐遣弟鉞破徐約於蘇州以海昌都將沈粲行刺史事而昭宗更命孺休為之以粲為制置指揮使鉞不悅密遣粲害焉孺休之見攻也曰勿殺我當與爾金粲曰殺爾金焉往與兄述休同死

李友合肥人有膽勇能撫士卒事楊行密以功遷尚書
蘇州刺史大順元年孫儒陷蘇被擒謀翻城事覺為
儒所害贈太保

成及字弘濟錢唐人光啟初江浙兵亂及保聚富春自
稱靜江都指揮使後從錢鏐討劉漢宏以功奏遷官
至檢校司空乾寧初授蘇州刺史三年楊行密圍蘇
州常熟鎮將陸郢巡檢郭周等以城應之及被執行
密閱及家所蓄惟圖書藥物賢之與歸淮南將署為

行軍司馬及拜且泣曰及百口在錢公所蘇城陷不能死敢求富貴邪願以一身易百口之命引佩刀欲自刺行密遽起持之館於府舍其室中亦有兵仗行密每單衣詣之與同飲食無所疑光化元年具禮遣歸鏐迎勞郊外把袂而泣署鎮海軍節度副使以平徐綰功奏授保大彰義等軍節度開府儀同三司曹圭臨平人父信唐末兵亂保聚自守嘉興以來人咸歸之圭少有膽勇乾寧中淮人圍嘉興與族人師魯

固守淮人不敢逼錢鏐壯其功由嘉興都將授蘇州制置使開平中淮兵再圍蘇屬正月望夜圭就師魯第盛陳燒燈之燕令俘虜縱觀淮人驚焉以浙西營田副使檢校太傅卒于蘇

錢元璿字德輝吳越王鏐第四子儀狀瑰傑風神俊邁乾化二年改刺蘇州累授中吳建武軍節度使蘇常潤三州團練使佐正匡國功臣大彭郡開國侯加檢校太師同平章事中書令守太傅彭城郡王治蘇三

十年儉約鎮靜郡政循理天福二年弟元瓘襲位元
瓘觀之燕於宮中元瓘舉酒為壽曰先王之位兄宜
當之俾小子至是皆兄推載之力元瓘俯伏曰王功
德高茂先王擇賢而立敢忘忠順因相顧感泣兄弟
訖無間言七年詔封廣陵郡王未受命卒謚宣義子
文奉

文奉字廉卿元瓘第二子善騎射能上馬運槊涉獵經
史音律圖緯醫藥鞠擊皆冠一時以蔭為中吳軍衙

內都指揮使改節度副使幾三十年及嗣元璪為節
度使累加至檢校太尉兼中書令嘗於郡中創南園
東墅及諸別第延接賓旅任其所適文奉飲兼數人
嘗乘白驃披鶴氅或泛舟池中遠近聞賓客笑語聲
則就飲為樂所聚圖籍盈於齋中古器稱是自號知
常子雅有鑒裁禮下賢士一時才藝多依之與賓僚
采史籍著資談三十卷初元璪在郡夢登烏鵲橋見
禽獸充牣城中旁人云二郎祿料也文奉嘗問命於


天台僧德韶韶答書云明公己巳八十一至開寶二年己巳歲八月十一日卒始驗其語謚威

孫承祐錢塘人吳越王錢俶納其姊為妃因擢要職國事無不領轄時稱為孫總監累遷浙江東道鹽鐵副使鎮海鎮東兩軍節度副使知靜海軍節度事開寶中詔光祿大夫檢校太保鎮東鎮海等軍行營司馬開寶五年俶又私署中吳軍節度七年俶遣承祐入貢先是諭旨於俶將有事江南及王師度江詔俶以

所部攻常潤承祐從俶克常州功居多八年詔改中
吳軍為平江軍真授承祐節度九年從俶入朝太平
興國三年二月從俶再朝三月次宿州永城承祐齎
表詣闕俶遂至京師五月上表盡獻其地詔徙承祐
為泰寧軍節度使五年從幸大名留知府事承祐治
蘇凡七年雍熙二年改知滑州卒

杜叔詹不詳所歷嘗蒞郡重建孔子廟王禹偁有書云
今大司農京兆杜公典郡新廟礱石將有述焉事未

果而漢南歸于京師故其辭缺焉按錢俶納土雍熙
元年進封漢南國王據此當是錢氏命叔詹繼承祐
為郡也



姑蘇志卷三十八

欽定四庫全書

史部

姑蘇志卷三十九

四十九

詳校官編修_臣曹振鏞

檢討_臣德生覆勘

總校官知縣_臣楊懋珩

校對官中書_臣李 燾

謄錄監生_臣郭洽怡

欽定四庫全書

姑蘇志卷三十九

明 王鏊 撰

宦蹟三

閻象鉅野人吳越納土被命領禁兵千人至蘇安撫軍
民遂知州事能知其風俗徧揉以善政或摩以漸或
革以宜推凡上之所欲施寬凡民之所不堪恩涵澤
沛民以蘇息政成召還改濟晉黃棣青等州卒

梁周翰字元褒管城人太平興國五年以知高郵徙蘇

州周翰善音律喜誦博州有伶官錢氏家數百人日
令百人供伎每出以博具自隨郡務不治以本官分
司西京

柴成務字寶臣濟陰人太平興國中以殿中侍御史知
蘇州除兩浙轉運使成務有詞學博聞稽古善談論

然為郡乏廉稱

按王禹偁文成務雍熙元年自治書
侍御史典郡四年三月任滿四月改

戶部員外郎直史
館兩浙轉運使

許衮字公儀燕人雍熙中為均州防禦判官郡將表具

能狀拜太子右贊善大夫通判蘇州時二浙之地始
歸朝廷宿政如琴絲袞善理之就進殿中丞

宋璫字寶臣渭南人淳化中三吳歲饑民疫擇長吏治
養之命璫知蘇州璫體豐碩素病足州地卑濕疾益
甚或勸其謝疾北歸璫曰天子以民病俾我撫綏我
又以疾辭非臣子之義也先是太白犯南斗璫曰斗
為吳分民方饑天象如此長吏得無咎乎四年十月
庚午卒上嗟悼錄其子明遠為蒲城主簿璫性清簡

歷官三十年未嘗問家事唯聚書以貽子孫且曰使
不忘本也

陳省華字善則閬中人智辯有吏幹至道初以祠部員
外郎知蘇州賜金紫時遇水災省華復流民數千戶
孳者悉瘞之詔書褒美官終左諫議大夫

裴莊字端已閬中人在蜀以明經及第真宗即位以河
南轉運使移知蘇州咸平二年命巡撫江南景德中
安撫兩浙莊有吏幹慷慨敢言太宗獎其忠謹多所

聽納好為規畫頗疎於學術云

喬維嶽字伯周南頓人咸平初自海州刺史知蘇州仍帶前任維嶽素病風上以吳中多食魚鱗乃從壽州命太醫馳療之四年卒

陳彭年字永年南城人歷懷州推官深為知州喬維嶽所委任真宗朝為祕書郎惟嶽刺海州及知蘇壽二州並表彭年通判州事咸平中直史館上大寶箴拜參知政事進兵部侍郎卒謚文僖彭年性敏給博聞

強記朝廷典禮無不參預

張去華字信臣襄邑人幼勵學敏於屬辭咸平二年自知杭州徙蘇州頃之以疾求安得守本官分司西京去華美姿貌善談論有蘊藉頗尚氣節

仲華

姓里缺

咸平四年以太常少卿知永興軍移蘇州五

年十一月改右諫議大夫知杭州

廬志云按本傳轉運使任中正上其

治狀拜右諫議知杭州既而謝泌為使奏劾仲華徙任冒請蘇州添給詔罰金移虔州

康懷珪宋初任平江軍節度推官

見王禹偁作神道碑

梅詢字昌言宣城人自通判杭州知蘇州

按實錄以右司諫除知蘇

州壁記云朝散大夫太常卿直集賢院與本傳同而祥符九年十一月虎丘詩刻云尚書祠部員外郎

就徙兩浙轉運副使入判三司開岸司遷太常博士
出知濠州湖北轉運使降通判襄州知鄂州又徙蘇
州歷樞密直學士出知許州卒詢性卞急好進侈於
奉養至老不衰然數為朝廷言兵

曾致堯字正臣南豐人以直史館為京東轉運鈎得匿
貨五百萬計稱旨除祕書丞兩浙轉運副使改正使

淳化五年致堯言所部秋租惟湖州督納及期而蘇常潤三州悉有逋負請各按賞罰以勸懲之太宗以其刻薄又以江淮頻年水災蘇常潤特甚詔致堯倍加安撫勿得搔擾民或失所罪有所歸始諫議大夫知蘇州魏庠侍御史知越州王柄愔於政治喜怒縱入百姓病之庠介舊恩以進柄喜持上致堯獻書條劾之帝覽書驚曰曾致堯乃敢治魏庠可畏也庠柄由此被絀久之致堯移知壽州景德四年以尚書吏

部員外郎自知泉州移蘇尋徙揚州卒

黃震字伯起浦城人累擢江淮發運使發李溥姦贓溥

坐廢震亦奪官後至廣東轉運使

本傳不言知蘇州
壁記亦無今從范

盧二志據吳江
學記碑補入

秦羲字致堯江寧人大中祥符中以東染院使知蘇州

改崇儀使除提舉在京諸司庫羲知書好為詩喜賓

客頗有士風歷財貨之任凡十餘年精勤練習號為

稱職

王罕字師言華陽人贊之子大中祥符三年以父任補官再調為平江軍節度推官終光祿卿

孫冕字伯純新淦人咸平中為兩浙轉運使天禧中以

大中大夫行尚書禮部侍郎

一作郎中

直史館上柱國賜

紫金魚袋知蘇州治獄不濫斷訟如神弛張在已無

所吐茹吏畏而民愛之嘗病癰州人爭為詣佛寺祈

福復立生祠於萬壽寺甫及引年大書一詩於廳壁

拂衣歸九華山朝廷高其風許再任召之不起

徐奭字武卿建安人祥符中進士第一天聖初通判蘇州時東南大水詔奭與趙賀督治奭周視盡得水利舊跡乃築石塘九十里建橋十八所復良田數十萬畝疏隱田者二萬六十戶得苗三十萬詳水利條塘成遷兩浙轉運使封晉寧侯致仕遂家吳中子孫別有傳盛度字公量先居應天徙餘杭世仕吳越真宗時為翰林學士自知滁州遷集賢院學士知蘇州還知審刑院官至參知政事知樞密院以尚書右丞罷卒謚文

肅

塵史云
謚安肅

度好學家居手不釋卷然性猜險平居僚

友不敢易言語所至下貧無賴多所縱舍稍有貲者
一切繩之以法

王駸字總之臨城人歷官著作佐郎太常博士侍御史
三司戶部副使樞密使曹利用得罪駸以同里為利
用所厚出知湖州徙蘇州卒謚忠穆

章岷字伯鎮浦城人天聖中為平江軍節度推官時知
州盛度黃宗旦多以事委之度嘗俾閱經史凡及吳

事者錄為一書書成藏盛氏人不復見岷時名籍甚
廣新廳解記刻多岷文與弟峴岵皆侍親居郡中士
大夫多稱之

岵字伯望為兩浙轉運使有威名及知蘇州始下車會
暴風湖海之濱民或漂溺岵遣吏巡視賑卹請蠲田
租人不失所鉏治姦吏飭治衆職大小悉舉豪右莫
不畏懾以政最聞詔曰吏不數易然後得以究其才
今夫蘇劇郡而爾為之守克有能稱嘉省厥勞仍其

舊服往惟率職不懈以稱吾久任之意哉時議欲大修郡城浚治運河岵務愛民力請罷其役民甚德之性剛介不屈人目為章硬頸

王質字子野莘人用伯父旦蔭三遷至大理丞年尚未冠以楊億劉筠薦召試賜第聲動京師除太常博士集賢校理尋拜祠部員外郎通判蘇州知州黃宗旦得盜銷鑄者百餘人以詫質質曰事發無跡何從得之曰吾以術陰鉤之質曰仁者之政以術鉤人寘之

死地而又喜乎宗旦不覺身去坐榻謝曰微君之言
吾幾失矣竟薄其罪入朝判吏部南曹

吳育字春卿建安人仁宗朝蘇州僉判又舉賢良方正
擢著作郎直集賢院通判蘇州知州黃宗旦負材自
喜頗以新進少育議事則曰少年乃與丈人爭事育
曰受命佐君有事當爭職也宗旦雖屢屈而政常得
無失頗德育助已為之加禮育性明果強學博辯所
至作條教疎簡易行而不可犯辨論明白使人聽之

不疑體素羸少時力學因得心疾在蘇得古方和丹砂餌之大醉一夕而愈官至尚書右丞謚正肅

趙槩字叔平虞城人以祕閣除蘇州明年丁母憂服除召為翰林學士卒謚康靖槩為人怨怒不形於色專務掩惡揚善以德報怨出於至誠非事矯強人以為劉寬婁師德之徒云

張去惑景祐初為平江節度推官郡適水災轉運使委去惑分捍水道朝廷錄功除將作監丞

滕宗諒字子京河南人慶厯中知岳州治為時最移知
蘇州未逾月江浙間喧然稱有神明之政俄卒于郡
張伯玉字公達江西人慶厯初為郡從事剛介有守文
藝甚高范文正公愛重之舉詞有云天賦才敏學窮
閭奧善言皇王之治博達古今之宜素蘊甚充清節
自處後應詔赴制科去

杜曾字孝先雷澤人舉進士蘇州司法參軍明於法律
改潁州團練判官慶厯中選吏部郎中

胡宿字武平晉陵人慶厯中知蘇州移兩浙轉運使終
樞密副使宿清謹忠實臨事重慎言不輒發亦不可
回止其篤行自勵至於貴達常如布衣時卒謚文恭
梅摯字公儀新繁人歷知昭州二浙饑官貸種食已而
督償頗急摯奏借貸本以行惠乃重困民不便詔下
其事併他州亦得緩期擢殿中侍御史以戶部副使
出知海州徙蘇州

摯以慶厯八年正月除有五日入
公燕詩云到官三月始開筵

為度支副使摯性淳靜不為矯厲之行政跡如其為

人喜為詩有奏議四十餘篇

王琪字君玉華陽人歷兩浙淮南轉運使以龍圖閣待
制知蘇州移潤州江寧府復以知制誥知蘇州坐失
舉保任徙知饒州後以禮部尚書致仕琪性孤介不
與時合數臨東南名鎮政尚簡靜每疾俗吏飾厨傳
以沽名譽故待賓客頗濶略云

蔣續

一作結

堂之孫也皇祐中僉判平江軍堂卒續自言

少孤育于祖乞服衰以報朝議以堂有子不許遂辭

疾謁醫去職行服嘉祐中復知吳縣事

蔡抗字子直宋城人歷平江節度掌書記嘉祐中通判
秦州吳中荐饑朝廷擇守將經制其事遂以祕閣校
理太常博士知蘇州到任行縣按水又置射堂於州
宅明年改廣東路轉運使

鞠真卿字顏叔慶歷中守將作監主簿知長洲縣所至
有威名嘉祐中知蘇州政事無他施設而人自憚之
訟庭寂然每平明視事無訟者真卿即歸休客至多

不及見治平初除兩浙提刑後貶南安軍道過蘇郡
人相戒不敢過其泊舟處五日左右不聞人聲其見
憚如此

司馬光字君實涑水人寶元中除奉禮郎時其父池仕
於杭光求僉書蘇州判官事以便省親許之元祐中
拜相

蒲宗孟字行正新井人為蘇州推官英宗以水災求直
言宗孟上疏言極剴切既又地震復上疏指斥大臣

官禁宦官遂除祕閣校勘神宗朝為尚書左丞

沈兼字子達歷太子中舍通判蘇州能名籍甚性好剛
遇事果急不顧計與守爭可否不為少屈重犯轉運
使守使相與害兼入之法除名免官兼歸怡然無趨
戚言

李禹卿字君益唐宰相吉甫八世孫自郢州僉判除通
判蘇州隄太湖八十里為渠益漕運其口蓄水溉田
千餘頃歲饑出羨粟三萬全活萬餘人移通判袁州

會知州翁及死禹卿哀其貧適吳人歸職田錢二十萬立分其半遺及家僚屬乃亦合錢二十萬以賻遷知澤隨二州既去民懷其恩官至司農少卿

黃鑑字唐卿浦城人少敏慧過人師同郡楊億嘉祐中以直集賢院奉詔同修唐書會司諫劉隨上疏乞章獻太后還政出知濟州鑑抗章乞留隨以重朝廷併排劉從義馬崇正之橫言極鯁切太后怒出通判蘇州宋祁歐陽修范仲淹率館中同僚祖餞舉酒相弔

君以直言不得自安於朝廷吾儕有愧安能久尸位
邪未幾仲淹等皆調外職鑑奉母之官繼丁家艱逮
服除沐浴秉笏端坐而卒詔官其一子

李清臣字邦直魏人治平二年以虞部員外郎秘書郎
僉書平江軍判官名聲籍甚歐陽修以館職薦召試
擢集賢校理歷官尚書左丞門下侍郎

陳軒字元興建陽人嘉祐八年四月授平江軍節度推
官歷官兵部侍郎

潘夙字伯恭鄭王美從孫知桂鄜蘇潭鄂等州以將家子而能留心政務用當其材舉能其官

夙自蘇移潭續志作自潭

移蘇誤

邊珣字仲寶楚丘人歷鹽亭尉以孫沔辟書寫河東路經歷安撫都總管司機宜文字改平江軍節度推官會沔知杭州以事斥珣亦並緣被譴英宗起沔經略陝西有司亦言珣無罪狀乃復其官始赴平江任崑山旱蝗檄珣督捕瀕海萑葦盤互蝗集其下莫知為

計珣命連挺碎根植于上而斃之諸郡取以為法又嘗直盜牛之寃後其家言輒流涕歷邠州觀察支使揚州觀察推官紹聖二年卒于蘇珣性孝悌與人交有終始在官有能名公卿皆所推重子裕自有傳

孫覺字莘老高郵人治平三年夏以民曹掾權吳江縣有江橋延袤二百許丈役大難集覺募民修治之勢愈雄壯及河塘兩岸甚繁前政科買竹篠率數年一修易敗而過致潰決覺又市石增築遂得支久祠廟

廢缺者新之上官信任而吏民樂從才既通敏優逸
有餘復葺如歸垂虹兩亭詮次邑中留題百餘篇為
松江詩集歷館閣校勘直集賢院右司諫知潤州以
喪不赴服除知蘇州卒官御史中丞

王覲字明叟如皋人以直龍圖閣知蘇州州有狡吏善
刺守將意以撓權前守用是得譏議覲窮其姦狀寘
于法一郡肅然民歌詠其政有吏行冰上人在鏡心
之語徙江淮發運使歷官御史中丞覲清修簡澹人

莫見其喜愠持正論始終再罹譴逐不少變無疾而終

黃履字安中邵武人哲宗朝徙翰林學士附麗章蔡歷舒洪蘇三州移江寧府終尚書右丞

賈青字春卿韓城人丞相昌朝子也紹聖中知蘇州除兩浙轉運使元符初臺臣追論青在蘇州粉壁出賞斷人穢語罰錢入官造樂籍堂貧民力不能輸金自縊死者數人改知河中府子公望

公望字表之資稟甚豪嘗謂仕宦當作御史排擊姦邪
否則為將攻討羗戎餘不足為也通判蘇州疾朱勔
父子與奔競其門者為詩自厲因以刺之有陽光一
銷爍不復見妖魔之句時勔子為浙西路分賜金帶
公望亦衣三品服嘗以朝謁同集天慶觀勔從者晚
視公望佩魚公望厲聲叱之曰此是年及得來非緣
花石左右皆錯愕勔竟擠之罷去晚知泗洲翁彥國
勤王不進久留泗上公望面訶責之且約不復餉其

金史卷之八
卷三十一
軍及張邦昌偽命至率官屬哭於天慶觀聖祖殿而焚其赦書遂不能越泗而南時人服其壯烈

陳師錫字伯脩建陽人熙寧中游太學有俊聲神宗知其材及廷試奏名在甲乙間帝閱其文屢讀屢嘆賞擢為第三調安慶軍掌書記郡守蘇軾倚以為政歷監察御史遷工部員外郎知解宣蘇三州徽宗召拜殿中侍御史抗章言蔡京典刑未正願受竄貶出知潁州坐黨論監衡州酒削官置郴州卒師錫初論京

卞者四章惇者三因與陳瓘同論二蔡時號二陳

憲序辰字授之雙流人歷官中書舍人奏司馬光變亂
典刑由是縉紳之禍無可脫者徽宗立除名放歸田
里蔡京為相復拜刑禮二部侍郎尋黜知汝州二年
徙蘇州坐縱部民盜鑄錢謫單州團練副使江州安
置移廬永二州大觀初言者以序辰守蘇時以天寧
節同其父忌日輒於前一日設燕及節日不張樂有
詔勒停會赦復官

劉義仲字壯興高安人祕書丞恕之子太史范祖禹以
恕修書功奏補郊社齋郎清操有父祖風仕至國史
檢討忤蔡京不復仕曰吾知有天子不知有權臣

胡宗愈字完夫晉陵人屢遷祕書丞熙寧三年同知諫
院會李定自秀州推官除監察御史裏行宗愈論奏
坐奪職通判真州移蘇州七年會赦就改太常博士
歷尚書右丞吏部侍郎卒謚修簡

練定字公權元豐中為推官與朱長文方子通酬唱

陳幾道東明人為蘇州錄事參軍民有負公府錢自牖
出刺弱吏者度不可免乃行賂以族弟代之幾道正
其罪歲大凶承郡命賑救多所全活

唐充之字廣仁大名人博學善議論有幹局監蘇州酒
稅務知州李孝壽治尚峻猛不任僚屬充之權幕官
與之辯論曲直州人多賴之後守盛章於充之為姻
家初相友善時朱勔恃勢守歆附之衆多詭隨而充
之每著憎嫉之跡守不能堪勔亦羞怨竟傳致以酤

法坐罷充之既廢貧困不能北歸寓寶應惟以讀書教子為事

莊徽字彥猷江都人居宜興政和初兩浙運副二年召還歷徽猷閣待制知興仁府徙平江六年四月御筆仰徽究心治水八月徽奏趙霖治水事宜時郡豪朱勔挾寵蔑視州縣中貴人緣勔而使者冠蓋相望皆能禍福人於齒頰間官吏無不傾身事之至郡守亦有出其門者徽獨不少假借勔輩深所畏憚訖不敢

讒當勔盛時朝廷命官造乘輿服御之珍於浙西諸郡有旨令徽與勔管當繼下詔罷郡人譴呼而旁郡方遷延幸其復徽曰此天子盛德事人臣當奉承不暇敢顧望乎即日結罷在官六年丐閒不允久之提舉洞霄官卒

盛章字季文襄陽人政和元年以朝奉郎直龍圖閣京畿轉運副使充集賢殿修撰知蘇州二年四月以治狀有功就除顯謨閣待制轉朝請郎賜紫金魚袋三

年二月春進木心大吉字及申請府額重建譙樓閤
四月除知真定府五月仍知蘇州六月以招徠賈客
鋪戶勾過新鈔轉一官九月詔赴闕陞顯謨閣直學
士依前知平江府十二月除樞密直學士宣和元年
七月臣僚言章守平江日於豪民居世英家借貸動
數千百緡請求囑託悉出其手物論喧騰章遂以女
妻之以弭外議

應安道無為軍人重和元年自祕閣修謨除中奉大夫

充徽猷閣待制知平江軍府管勾神霄玉清萬壽宮
提舉學事六月八日詔以兩浙霖雨滄民田平江尤
甚仰安道依已得指揮權撥米二十萬石賑之宣和
元年八月進直學士二年與祠四年六月臣僚言安
道在州日政無大小曲直咸以賄成安道生日吏民
依例以大銀香爐焚香致禱悉以入已尋起知宣州
言者復論之詔寢新命

樓異字試可奉化人鑰之祖也累官直祕閣知秀隨明

州賜金紫睦寇起以善理城戍有績進徽猷閣直學士知平江卒

賈誼宣和二年自將作監除大中大夫充徽猷閣待制知蘇州三年轉通奉大夫三月以備禦方臘有勞陞顯謨閣直學士七月提舉南京鴻慶宮四年三月坐在任出入人死罪失覺察降一官九月臣僚追論誼在郡惟務游燕衣紅銷金勒帛直繫出入持紅紗籠燭百數掾燭數十騎蹇侈靡恬不恤民頃緣縱釋重

罪失入平人及擅用御前錢物詔落職罷祠

胡直孺字少汲奉新人宣和三年為兩浙轉運五年由
江淮發運使除知平江入為戶部侍郎靖康中知南
京統兵勤王力戰為金所執以老得歸建炎中拜刑
部尚書

李邴字漢老任城人建炎中以資政殿學士提舉洞霄
宮未閱月起知平江視事三日坐累罷任依舊宮祠
明年引赦復元官邴嘗奉詔編類平江勤王及奏請

本末付禮部鏤板一時定計具草手疏皆邴及朱勝
非之筆也執政署名而已閒居十餘年卒謚文肅

湯東野字德廣丹陽人建炎二年以祕閣修撰自江西
轉運副使知平江兼兩浙路兵馬鈐轄時州兵驕玩
為甚東野視事信宿兩卒入嫠婦家取酒不與直毆
主人壞釀器掉臂去東野取斬以徇列營惴肅三年
車駕幸杭苗劉作難明受赦至東野疑之時張浚參
贊御營軍事留平江東野與謀欲匿赦不宣浚曰事

如此胡可匿且卒徒觖於望賜吾徒先受禍矣因與
密謀取故府所藏登極赦書置輿中迎登譙門讀而
張之即捐其階禁毋輒登者而散金帛如常時郊賚
之數人情略定又與浚議勤王會張俊提兵往行在
道遇偽詔還秦鳳師薄城下東野大喜夜叩浚開城
納俊師未幾間使持偽詔令東野斬二張東野慮俊
武人易動即先攜見浚與偕謁俊斬使者而焚偽詔
於是謀益堅貽書抵呂頤浩於江寧推為盟主招韓

世忠劉光世皆以兵會軍中百須東野實主之師既
東東野獨為後備高宗復位以功超拜徽猷閣待制
入為工部侍郎三年五月被命扈太后駕幸鄴九月
以兵部侍郎自鄴銜命先至平江應辦南幸尋兼權
建康府駕幸越州同知樞密院周望宣撫浙西將屯
平江奏言非東野莫可守仍命東野知平江兼本路
安撫使進徽猷閣直學士兼制置使東野度望不足
與成功辭至七八不獲已而行既至調民夫置守城

五壁部隊官及遣機宜邵彪王彥環用防城免夫錢募士及修治城壘樓櫓為戰守具甚悉望無所措畫東野所言悉棄不用即以蠟書具所與望議論本末馳奏乞別自將不然祇與俱死奏十餘上帝手勅報曰朕知卿甚深仗卿甚重宜與望協心同力以扞一方勿相同異於是不敢復言金兵薄城與望俱遁尋引咎自劾不報而臺評繼上請正失守之罪上特下詔曰湯東野昨累有奏陳守禦頗有倫理只緣事權

不專遂至失守與其他棄城不同可止落職尋再乞
祠上猶以東野可任繁劇移江東都轉運使言者奏
東野守平江敵騎迫近乃先期榜示禁約郡人毋得
出城而自脫身逃遁前後科率民間錢米無慮百萬
貫石以守城為名而卒不能保故於大中大夫上特
降三官依舊差遣遂罷奉祠紹興初從張俊討李成
以功復職為江淮發運使知揚州致仕卒

趙彥候字安卿彭城侯叔聚曾孫初調溧陽尉有能名

改平江節度推官攝宜興縣以牧馬券料為負嘗預
用二年後稅民以此病彥倖請諸司各奏釋舊逋禁
預借百年弊事一日遽絕歷典郡邑具有政績卒官
江西轉運使

姜浩字浩然明州人以承信郎監平江府都稅務甫冠
入仕厲志宦業動有可稱建炎中金將陷平江郡人
驚奔而聞者阻之浩叱吏開闕去者不勝計浩殿後
幾不免人皆德之及胡松年為守擇官僚十人日供

所事右列中惟浩得與選所陳又切中時病云

胡松年字茂老懷仁人

一云胸山人

建炎四年以右文殿修

撰起復知平江府未入境貪吏解印歛跡以興利除
害十七事揭於都市百姓便之明年進徽猷閣待制
時朝廷以邵琪張青反覆為盜命諸將毋得招安松
年上言大軍四合連旬不能破敵今敵據通州崇明
鎮沙上砦柵之外水淺舟不可行泥深人不可涉本
府錢糧已費十三萬貫石公私騷然而敵未可睥睨

况劉光世兵將多西北人一旦從事江海有掉眩不能飲食者安能與賊較勝負於矢石間遂詔光世措置及奏防江利害名為中書舍人言武昌江州建康鎮江吳江錢唐明越宜各屯水戰士三千為備歷官吏部尚書諜報劉豫侵邊詔遣松年往江上與諸將進討因覘敵情帝決意親征遂次平江命松年權參知政事專治戰艦張浚專治軍器俄以疾提舉洞霄宮卒方秦檜秉政天下識與不識率以疑忌置之死

故士大夫多曲意阿附為自安計松年至死不通一書世以此高之

趙子畫字叔問燕王五世孫少警敏強記工書翰建炎四年遷徽猷閣直學士知秀州平江府除兵部侍郎李光字泰發上虞人崇寧五年進士知常熟縣朱勗父冲倚勢暴橫光械治其家僮勗怒誠轉運使移令吳江光不為屈勗終不能害也歷知湖州時中書舍人任申先因奏事上言及輔郡守臣曰湖非控扼之地

今平江方擇人無如李光者乃授顯謨閣直學士知
平江會朝廷以乏軍儲措置和糴數以萬計戶部郎
官霍蠡奉命至郡光謂之曰主上自南渡以來屢有
約束戒科歛今米或可得第未知本錢安所取辦乎
殆有言利之臣惑上聽者光適論奏其事蠡聞亟引
去疏入有旨降本錢和糴不踰月而畢召拜禮部尚
書卒謚莊簡

蔣燦字宣卿宜興人樞密魏公之奇從子也以戶部侍

郎除集賢院修撰知平江府進敷文閣待制右大中
大夫禁戢姦偷鉏刈強梗植善柔拊貧弱獄市為清
諸軍牧馬有廐屋數百區茨以茅竹歲一更之用財
與力皆出於民燦請出內帑金佐其費掄材陶瓦覆
之堅壯可支數世州人歡呼相率詣北禪寺作佛事
以報諸將持人為兵補軍籍率用大舟往來漕河無
人處遇彊壯少年束縛鉗梏之惡少因利其貲囚閉
柵中無脫者燦盡得其姓名窮治株穴捕寘於法其

事遂絕郡潦大饑詔發常平粟燦調十二萬石給之
計道里遠近視男子婦人老幼強弱分日異處各有
法度悉無餓者已而長洲鬻獄燦與諸司皆坐貶降
右中大夫提舉洪州玉隆觀燦在郡時年已七十日
閱訟牒百餘雖精練少年不能過之作韋白劉三賢
祠以展邦人尊賢之意卒贈右正議大夫

章誼字宜叟浦城人歷官殿中侍御史邵青自太平乘
舟抵平江所至劫掠誼請置水軍於駐蹕之地以備

戰守詔從之紹興六年以龍圖閣學士自温州移守平江時將臨幸供億繁夥誼處之皆當理名對賜帶笏帝曰此不足以償卿之勞其勿謝又請均平本府稅役會名為戶部尚書卒謚忠恪

梁汝嘉字仲謨麗水人建炎中直祕閣提舉浙西茶鹽紹興初奏亭戶未嘗墾田令輸本色非便又言本路歲收鈔錢一百十九萬緡詔進秩一等除兩浙運判陞副使知臨安府遷戶部侍中紹興七年以寶文閣

直學士知平江又知台州十年再任既而殿中侍御史羅汝楫論浙西海道可虞以汝嘉兼浙西沿海制置使未幾升學士知明州汝嘉長於吏治在臨安風績尤著

仇愈字泰然益都人自知明州改平江陞辭言我軍已習戰非復前日比故劉錡能以少擊衆敵大挫衄若乘已振之勢鼓行而前中原可傳檄而定上甚嘉之洎到官為政刻急軍士頗不安朝廷亟罷之愈端方

提特自入官至貴顯無所附麗治郡典軍皆有遺澤
善政可紀史稱為愷悌君子

向子諲字伯恭臨江人文簡公敏中玄孫歷兩浙都運
使紹興八年擢徽猷閣直學士知平江御書薌林二
大字賜之陞辭奏曰陛下踐祚以來除學士待制無
慮數十百人此衆人所同拜賜薌林散人之號則臣
之所獨得其榮至矣願納祿復歸舊隱上弗許又賜
舟親題曰泛宅之官子諲到任未幾金使議和將入

境子諲不肯拜其詔乃上章言自古人主屈已和戎
未聞甚於此時宜卻勿受忤秦檜意累奏乞休致詔
曰卿從朕羈紲晚登禁途昔漢二疏以宦成名立乞
骸未若方被寵遇神明未衰如卿今日也由是轉官
致仕

周葵字立義宜興人紹興十三年知平江時兩浙運使
李椿年即本郡行經界法郡故田租不滿四十萬椿
年披榛莽按倉碣欲以七十萬為率葵辨之曰記中

所言歲儲穀數耳今法以穀二斛得米一斛正今日
數也可強增耶椿年遂以圖經三十萬為準初葵為
侍御史欲奏論戶部尚書梁汝嘉汝嘉致辭於秦檜
出葵知湖州檜蓄怒未已又易平江葵既以經界事
忤椿年椿年還都希檜意奏葵在郡宴金使飲食臭
敗致行人有詞遂落職罷任葵謝表有云雖宰夫是
供各司其職耳然王事有缺是誰之過歟自是投閑
十五年後卒官叅知政事謚簡惠

王暎字顯道華陽人太師岐國公珪之孫也為秦檜妻

之兄

或云妻弟

紹興中知郡事時兵火之餘公署學校靡

不興葺又錄入城小舟出必載瓦礫以培塘人以為

便石之碎者積而焚之以泥官舍不賦於民而用有

餘其規為多可取者然峻以聚歛用刑尤酷嘗於黃

堂前鎔錢鑄大士像而人不敢言每刺鹿血入熱酒

飲之疽發背死

鄭若虛為錄事叅軍以文學受知於知府王暎既獲薦

書四章意喚必為造就喚亦留一牘以待適四舉主
皆由儒科進其幕僚欲以計攘者往謁白先容於府
君通判云使君舉牘定與鄭糾他無可得之理幕僚
曰竊聞糾曹不欲受府君薦恐或可久通判復叩其
說曰視其爵里狀所列舉將頭銜可見既覩則四字
聯翩而喚與通判皆門蔭也異日從容為之申懇喚
言所以留之之意通判具以告喚怒若虛遂以坐廢
蘇師德字仁仲丹陽人魏公頌之孫紹興中為樞密院

計議官時同僚胡銓上書詆秦檜貶竄師德亦株連
去國久之通判平江適王晌知府事揣檜意日窺伺
師德師德廉直無所肆毒未幾周三畏繼晌後會康
與之前監杭州太和酒庫盜官錢飾翠羽為妓金盼
履坐免來吳三畏雖法家而北客例收卹舊族待之
甚篤與之又挾秦氏子弟請落妓趙芷籍攜去三畏
謀之師德師德謂此事乃與之終身之累三畏因追
還芷與之貽憾師德未幾常同卒於海鹽遂誣三畏

以庫金二百贖之師德為祭文有姦人在位公棄而
死之語檜大怒命中丞俞堯弼劾三畏落職併罷師
德又委提舉王珏鞠之獄上雖無左驗師德送汀州
編管子玘勒停同師德之壻玘之婦翁也或云師德同之壻
任盡言字元受眉州人右正言伯雨之孫通判平江先
是陳正同在郡弛縱不治盡言能助之朝廷錄其勞
除京西運判紹興三十年也既而盡言至都堂白母
老不願居邊郡尋改淮東提舉

趙雋之左文林郎平江軍節度推官紹興四年同知太
宗正事士儂言其在建炎間有勤王之請詔改京官
湯鵬舉字致遠金壇人累官兩浙轉運使時鄭滋兩任
平江政令縱弛鵬舉欲俟應辦金使至郡按之滋求
援於秦檜鵬舉詣檜辭行檜托致書於滋其緘題稱
門下士具位秦檜謹封鵬舉尋薦滋治狀改知建康
紹興更化力治秦黨鵬舉擢侍御史風采震動檜家
袁鵬舉平昔干請之書繳進由是出知平江右正言

張扶論其竊倖直之名濟貪污之行長惡不悛治郡
無狀遂罷後至參知政事卒謚敏肅

孟忠厚字仁仲其先洺州人昭慈聖獻太后兄子也靖
康元年知海州東京陷忠厚持后書遺康王王即位
後以保寧軍節度使判平江改紹興浙東安撫使忠
厚避遠權勢不敢以私干朝廷

朱翌字新仲龍舒人忠靖公勝非之孫以秘閣修撰知
平江府擢節浮費積緡錢四十萬於帑藏高宗視師

江上後守洪遵以獻賜詔獎諭

洪遵字景巖鄱陽人禮部尚書皓次子也紹興三十年
平江府湖秀二州水無以輸秋苗有司抑令輸麥遵
時為起居舍人試吏部侍郎上言麥價殊不在米下
民困如是奈何指夏為秋衍一以為二使擠溝壑乎
願量取其半而被水害者悉免之明年金主亮使蘇
保衡由海道窺二浙朝廷以浙西副總管李寶禦之
寶駐兵平江守臣朱翌素與寶異上以遵嘗薦寶乃

命遵知平江時步帥李捧請斷吳江橋或議塹常熟
福山以限敵騎者遵曰審爾是將棄吳以西邪凡堂
帖與監司符移皆留不行及寶以舟師擣膠西凡資
糧器械舟楫皆遵供億寶成功而歸遵之助為多車
駕幸建康衛士勾索無藝他郡隨與不饜至吳乃相
告曰內翰在此勿復然先是朝廷慮商船為敵有悉
拘入官又並海縣團萃巨艦募水手民兵皆繫留未
得去遵悉奏論以船還商而聽水手自便吳人德之

高宗倦勤諭呂頤浩曰朕將為揖遜之舉擇侍臣善辭令者使預為之底體制溫純可以傳遠頤浩薦遵召除翰林學士承旨一時詔令皆出其手官至同知樞密院江東安撫使卒謚文安

沈介字德和德清人歷中書舍人以次對知平江召歸上疏甚剴切備言敵必為患明年敵犯兩淮乃以兵部尚書為荊湖制置風采震聳邊郡及再知郡上諭以平江輔郡極難其人知卿政事特加遴選當為朕

撫恤百姓均財節用使恩威並施為佳如常平錢米
以備凶荒訓兵令精不必增補至於兵器亦令堅緻
其眷遇如此又知成都所蒞繁劇綽有餘暇豪猾歛
避焉

彭爚通直郎平江僉判江文忠公萬里薦之云士林前
輩有學有文貧而能廉老而練事曾躋政府尚淹郡
幕寘之館學庶無棄才

劉洵直字子浩莆田人性至孝有德望歷紹興府教授

虞允文等薦通判平江同列多貴遊豪縱洵直以儒
素禮法開警之久悉感厲時部使者得旨興水利檄
與共事洵直辭曰是役非鄭渠名埭之比已而同列
督役受賞進秩隨復鎬去識者服其先見

劉之華胸山人紹興三十一年魏勝領兵收復海州之
華與文儼謀罄家財輸軍借補將仕郎兩上書陳六
事皆恢復大計孝宗韙之特賜進士出身為平江通
判

高溶字慶遠宣仁后族初調平江糧料院通判軍府事
長官如父兄職守不便立法亟改郡有勢家園田墮
下流溶視水勢所向廢之人不敢怨移知荆門軍官
至司農少卿

沈虛中字太虛廣德人紹興間為平江儀曹掾攝郡事
會軍中有謀變者虛中挺身造其營語以禍福白郡
守開府庫贍給之皆驩呼投甲論功就擢僉判時丞
相朱勝非充御營使置幕府多所裨贊累遷吏部尚

書

一云紹興中有潰卒謀于市守倖倉卒遽亡虛中攝府事移文主將梟一人以令衆軍乃不譁丞相

呂頤浩張浚聞之召赴都堂論議就推僉判

趙慶孫右從事郎平江軍節度推官紹興六年十月翰林學士朱震等言其內行孝友施於政事明敏可觀引對特改右承事郎

吳芾字明可僊居人紹興十一年調平江府錄事參軍除勅所刪定官歷殿中侍御史給事中吏禮二部侍郎歷守六郡各因其俗為寬猛吏莫容姦民懷惠利

嘗曰視官物當如已物視公事當如私事與其得罪於百姓寧得罪於上官立朝不偶時論惜之謚康肅蕭燧字照鄰新喻人紹興十八年授平江府觀察推官二十三年秦檜親黨密告燧秋試必主文漕臺燧詰其故曰丞相有子就舉欲以屬公燧怒曰初仕敢欺心邪檜懷之既而被檄秀州至則員溢就院易一員往漕闈秦燧果中前列秩滿當為學官避檜調靜江府察推而歸浮湛州縣十餘年淳熙中累遷至國子

司業刑部侍郎出知嚴州移婺州歲旱浙西常平司
請移粟于蘇燧謂東西異路不當與然安忍坐視舊
治之災為請諸朝發太倉米賑之官至參知政事權
知樞密院謚正肅

嚴瑀字元瑜江山人紹興中進士卒官平江府錄事參
軍卜居汎仙山之溪以文字名家有溪上翁集

張孝祥字安國烏江人紹興中廷試第一歷知撫州年
未三十按事精確老於州縣者有所不及孝宗初以

集英殿修撰知平江郡務煩劇剖決無滯屬邑大姓
並海囊橐為姦利孝祥捕治籍其家得穀粟數萬明
年吳中大饑迄賴以濟張浚薦召赴行在除中書舍
人

虞允文字彬甫仁壽人

一云僊井人

隆興初除兵部尚書湖

北京西宣撫使時朝廷遣使詣金請和湯思退又欲
棄唐鄧海泗允文五上疏力爭思退怒奏允文大言
誤國以邀美名允文上印猶以四州不可棄為請乞

致仕除知平江思退竟決和議尋改潼川府未上再
除平江到任未一月召除端明殿學士同僉樞密院
事初允文自荆襄召還其子公亮遣書扣所向於蜀
術士楊抽馬楊荅云得蘇不得蘇半月去作同僉書
僉書不帶同字已久時錢端禮先為僉書遂加同字
果符其說後封雍國公卒謚忠肅

沈度以考功郎中除直秘閣知平江乾道二年七月召
赴行在上曰甲申之歲委卿守吳門未幾治行昭著

果如朕所料可謂得人又詢吳中歲事如何具以豐穰對上曰二年以來水澇軫憂惟恐懼修省以百姓為念耳度奏臣初到郡水歉艱食荷陛下捐四萬餘石馬料以賑濟全活甚衆上曰正賴良守措置漢宣帝所謂與我共理者其惟良二千石乎即以為中書門下省檢正諸房公事

按周必大呂紫微詩跋云乾道二年平江守沈公雅疑即

度字也

姚憲字令則嵎人父舜明字廷輝宣和初知崑山縣月

餘以母憂去欽宗朝為御史偽楚之際守節不污南
渡後至戶部侍郎卒贈太師憲以父任累官知秀州
浙西大水蘇常尤甚憲請輸粟萬斛以賑之上賜書
獎諭除提舉浙西常平遷提刑又以直秘閣知平江
時羣盜毛鼎等出歿海道為害名捕弗獲朝命專以
屬憲不數月悉擒之轉階除兩浙轉運判官歷官至
參知政事

徐嘉字吉卿衢州人乾道中自道州移知平江高宗語

孝宗曰是嘗手奪國書者詔過闕覲兩宮在官踰年累章勾祠

汪應辰字聖錫玉山人紹興進士第一累官吏部尚書與丞相虞允文議事不合遂以端明殿學士知平江韓玉被旨簡馬建康過郡應辰略其禮玉歸諧於上曰臣所過州縣未有若平江之不治者上疑之及平江米綱至有折閱事遂貶秩應辰剛方正直少從呂居仁胡安國游張栻呂祖謙深器許之

魏杞字南夫壽春人

一云開封人居明州

累官參知政事右僕射

兼樞密使以使金不辱命繇庶官一歲登相位上銳
意恢復杞左右其說後以災異策免守左諫議大夫
觀文殿學士知平江被論奪職卒謚文節

丘崇字宗卿江陰人歷國子博士虞允文薦其才遷太
常博士知華亭縣捍海堰廢且百年鹹潮歲大入壞
並海田蘇湖皆被其害崇至海口訪遺趾已淪沒乃
奏勅築三月堰成三州斥鹵復為良田除直秘閣知

平江府改吉鄂二州江西轉運判官提點浙東刑獄
進直徽猷閣再知平江以提刑日捕盜賞除直秘閣
後改兩浙轉運副使卒諡忠定

一作文定

方滋字務德少寓吳江應天寺建炎間歷浙西提舉司
幹官乾道中知紹興平江二府

趙善擇字守道寓居金壇乾道中任平江司戶廉公不
私物莫能奪而疾惡良甚部使者郡守見之必竦然
起敬平江府添司戶柴某貪濁善擇疾之反以其罪

去為湖州錄事參軍

姑蘇志卷三十九